



Irurtzun-Andoain autobidea

'Askatuak' atzo bildu zen Diputazioaren eskaintzaz erabakitzeko

DONOSTIA

Donostiako 'Askatuak' saskibalo taldea atzo arratsaldean bildu zen Gipuzkoako Diputazioak egindako eskaintzari buruzko erabakia hartzeko. Artikulu hau idazteko orduan, talde honetako asanblada Donostiako 'Costa Vasca' hotelean bilduta eta erabakia hartu gabe zegoen.

Diputazioaren eskaintzaren arabera, diru beharrean dagoen talde donostiarra bi urtez finantzatu du, baina ordainean lehen mailan dagoen Gipuzkoako saskibalo talde bakarrak 'Leitzarango autobidea' izena erabili beharko du.

Atzo 'Diario Vasco' egunkariak kaleratu zuenez, taldeko zuzendari zein zaletuek, edozein ideologia izanda ere, gogor gaitzetsi zuten Diputazioaren eskaintza, ezbidetkotzat jo bait zuten saskibalo taldea erabiltzea kirolari ez dagokion gai bat defendatzeko.

Izan ere, zaletu eta zuzendari hauen ustetan, Gipuzkoako Diputazioak Leitzarango autobidearen proiektu ofizialaren propaganda egitearen truke taldea lagundu ahal badu, ez dago arrazoirik halako izen gatazkatsua erabili gabe ere ez laguntzeko.

Gauzak honela, talde honetako 200 bazkideek etorkizuna bera erabaki behar zuten atzoko bileran, beste sponsorrik aurkitu gabe, Diputazioaren eskaintza onartzen ez badu, taldeak Lehen Mailako lekua salgai ipiniko bait du, eta Gipuzkoan kirol honen goi maila baztertu.

«Planteamendu interesgarri bat» sortu da Galdos-Lurraldea bileratik

Aztertu ondoren berriro bilduko dira bi aldeak aste honetan bertan

«Planteamendu interesgarri bat» sortu zen atzo Eli Galdos Gipuzkoako diputatu nagusiaren eta Jonan Fernandez Lurraldeako bozeramalearen arteko bileratik, azken honek bi ordu t'erdia iraun zuen bileraren amaieran adierazi zuenez.

P. URZELAI / DONOSTIA

«Planteamendu interesgarri bat dago eta bakoitzak bere aldetik aztertzeke gelditu gara eta bigarren bilera bat egingo dela aurreratu ahal dut», esan zuen Jonan Fernandezek bileratik ateratzean Gipuzkoako Foru Diputazioaren Jauregian bertan.

Jose Ramon Beloki, Diputazioaren prentsa arduradunak jakin erazi zuen Diputazioaren aldetik ez zela adierazpenik izango. Jonan Fernandezek esandakoari uko egiten ez bazitzaion zuzena zelako izango zela ulertarazi zuen Jose Ramon Belokik, Lurraldearen bozeramaleak azalpenak egin zituenean bertan izan zela-rik.

Bigarren bilera aste honetan izango da, eguna eta ordua zehazteke badaude ere, Jonan Fernandezek adierazi zuenez. Bien aldetik sortutako



Jonan Fernandez, Gipuzkoako Diputazioaren Jauregiaren aurrean, bilera amaitutakoan.

CARLOS VILLAGRAN

planteamenduari buruz, Jonan Fernandezek ez zuen argibiderik eman, eta beharrezko diskrezioa aipatu zuen. «Diskretoak izateko ados gauden, gai hau portu onera eramateko borondatean oinarriturik», esan zuen Lurraldearen bozeramaleak.

Bilera «atsegina» izan zela eta Imanol Muruarekin baino «irekitasun handiagoa» somatu duela gehitu zuen, aurreko diputatu nagusiarekin izandako bilera «atsegina» izan bazen ere.

«Adierazi dgun bezala nolabaiteko baikortasunarekin etorri gara hona, eta esan daiteke ekarri duguna baino handiagoarekin irten naizela», azaldu zuen Fernandezek.

KONTSENTSUA LORTZEKO ESPERANTZAN

Bileran Irurtzun-Andoain autobidearen arazoaren alde asko aztertu zuten bi aldeek, bai ikuspuntu historiko, ekologiko, zein tekniko. Joan zen astean Felipe Rey Patiñok jasan zuen atentatua bileran aipagai izan zela onartu zuen Lurraldeako bozeramaleak, ez ordea Diputazioak Askatuak saskibalo taldeari eginiko proposamena, «Leitzarango autobidea» publizitatea sponsorizat onartzearena, alegia.

Kazetarien galderei erantzunez, Jonan Fernandezek argitu zuen ETaren atentatuen gaitzespena ez zela bileran egon baldintza gisa.

«Kontsentsua lortzeko esperan-

tzarekin ari gara lanean, esperantza daukagu, zaila dela badakigu ere», adierazi zuen Jonan Fernandezek.

Beste daturik ez badago ere, bileraren ostean Irurtzun-Andoain autobidearen gatazkan bi alde nagusien arteko akordioa posiblea dela dirudi, bi aldeek elkarren artean hitzegin dezaten orain arte horrelakorik onartzen ez zutenen aldetik trabarik egon ez dela eta sektore sozial askoren aldetik adostasuna erdies- teko ahalegin hau ondo ikusia izan dela kontutan harturik.

Dena den, mobilizazioek aurrera egingo dute eta aste honetan bertan, ostegunean, mendi ibilaldi bat antolatu du Lurraldeak.

Gipuzkoarren % 62 akordioaren alde dago autobien gatazkan

DONOSTIA

Gipuzkoako biztanleen gehiengo adostasuneko irtenbidearen alde agertu da Leitzarango autobidearen gatazkan, IPES elkarteak Egin egunkariarentzat egindako inkestaren arabera. Ikerketa soziologikoak dioenez, inkestatuen % 62,2 proiektu ofizialaren alde eta aurka dauden arteko akordioaren alde dago. % 21,6k erakundeek landutako proiektua onartzen du inolako zantzarik gabe. Inkestatuen % 16,2k ez du iritzirik eman autobidearen arazori buruz.

Batez ere gazteak dira adostasunaren alde daudenak. 24 urtetik beherakoen % 75 honen alde dagoen bitartean, 25-44 artekoen artean adostasuna % 68ra jaisten da. Adin guztietan elkarriketaren aldekoak nagusi badira ere, adina aurrera joan

ahala proiektu ofizialak bultzatzaile gehiago ditu. 45-64 eta 65tik gorakoetan % 27,9 eta % 26k onartzen dute Diputazioak proposatutako ibilbidea.

Botoen arabera, hiru talde bereiz daitezke argi eta garbi. Lehenik, HBren botoemaleak (% 90,5), abstenitzen direnak (% 66,8) eta botatzeko adinarik ez dutenak (% 70,2) dira kontsentsuaren alde agertzen direnak. Beste punta batean proiektu ofizialaren alde jotzen dutenak daude, PSOE (% 56,8) eta PPko (% 100) botoemaleak batipat. Hirugarren talde batean ibilbide ofizialaren alde baina neurri txikiago batean dauden botoemaleak ditugu: EE (% 40,5), EAJ (% 39,7) eta EA (% 36,6). Inkestatuen % 42,1ek uste du, gatazkan dauden bi aldeak ados izan daitezkeela. % 29,9 ezezkorrakoa agertzen da eta % 28,7k ez du iritzirik eman.

Poliziaren aurrean deklaratu zuen atzo Felipe Rey Patiñok

MADRIL

Felipe Rey Patiño, ostiraleko atentatuan zauritutako enpresariak atzo deklaratu zuen Poliziaren aurrean. Deklarazio hau garrantzi handikoa da atentatuaren nondik norakoak jakiteko, orain arte egindako adierazpenetan ez bait datoz bat Rey Patiño eta Polizia. Enpresariak bonba-gutuna aztertzeraz eraman zuela eta arazorik ez zuelako itzuli ziotela esan arren, Poliziak lehergailua detektatutik ez zela pasa jakin erazi zuen. Atentatu berean zauritutako Antonio Llanes goardia juratuak ezin izan du aitortzen egin nahiz eta bere osasun egoerak hobera jo duen. Polizi iturriek Eferi esandakoaren arabera, oraindik ez da ezagutzen bonba-gutunak zeraman leherkari mota eta kopurua.

GETXOKO UDALA  **AYUNTAMIENTO DE GETXO**

ZUGAZARTE IBILBIDEKO ERREIEN BEHIN BEHINEKO ALDAKETA

Cristobal Valdés kalean egin beharreko Gobela ibaiaren gainezkabi- dearen eraikuntza lanak direla eta, Iparraldeko Konfederazio Hidrografikoak burutuko dituenak, ZUGAZARTE ibilbideko ERREIAK BEHIN BEHINEKOZ ALDATU EGINGO DIRA, ABUZTUAK 6, ASTEARTETIK hasi eta IRAILAREN erdiraldera arte.

Otoi, kasu egin seinaleztapenari eta barkatu gerta litezken eragozpenak.